

Haetneix hwnqcong z baez hai cueng, raq rumz he cife deaengz gwnznaj, gij hoengheiq singisien hix riengzlaeng bongh daeuj. Baihrog ndit ronghsagsag, rongh ndaej lwenqda, gij sing vunz gangjriu caeuj sing ci lahbah doxgyaux ndaej nauhyied raixcaix.

Ngoenzneix dienheiq baenzndei, naemj daengz caenhneix guhhong miz di nyaengq, lij caengz ndaej bae yihsen daj gij yizmiuz re sinhgvanh binghdoeg, gwn ngaizromh gvaq le, gou cigsoh byaij bae yihsen.

Song bi neix, sinhgvanh binghdoeg ak lumj duzuguk nei, lah doh gwnzbiengz, hawj haujlai vunz saet bae diuzmingh dijbauj. Guek raeuz caeklaiq baengh dangj caeuj cwngfuj gaemhguenj ndaej ndei, mbouj deng lah geijlai. Guekgya caux ndaej gij yizmiuz re sinhgvanh binghdoeg le, bineix hainduj heuh gyoengqvunz bae yihsen daj, mbouj deng gag ok saek faen ngaenz.

Rox aen siusik neix, gyoengqvunz angqfwngfwng boux iu boux guhdoh bae yihsen daj yizmiuz.

Seizneix gou naemj: Mbouj ndaej caiq doeklaeng lo, aeu insik ndangdaej diheij, mwngz boux vunz he baenzbingh, lij lah deng vunzwnq, boux lah boux, saeh iq bienq saeh hung lo.

Gou daengz yihsen, raen gyoengqvunz gaeng baiz song hangz doih raezrangrang. Gou sien byaij daengz baihnaj ndomqyawj cingzgvang, raen dahsau husw lengilili he naengh youq gizhaenx. Gou cam naeuz: “Dahsau, baenzlai vunz daeuj baiz doih daj yizmiuz, dwg mbouj dwg ngoenzneix miz yizmiuz lai ne?”

Dahsau riu naeuz: “Dwg ha, seizneix yihsen ceiq lai dwg cungj yizmiuz Anhveih Swngj caux, aeu daj cim baez cij ndaej, gek ndwen ndeu couh daeuj daj cim ndeu. Dahcej, mwngz ganjvaiq bae baiz doih lo, mboujnex couh gvaiz lo.” Gou yaek baenqndang deuz seiz, raen gyoengqvunz baiz doih mbienghaenx, boux canghyw mehmbwk raed byoemdinj he, cug boux fat mbaw biuj heuh haeuj baihindaw bae daj yizmiuz.

Doenghboux ndaej daj cim ndeu roxnaeuz song cim gvaq haenx, canghyw couh sijsaeq yawj mbaw biuj daengz seizgan dajcim caengz. Boux canghyw haenx naeuz, ndaej daj cim daih’it le, caiq daeuj daj cim daihngieih caeuj cim daihsam, doekgonq ngoenz ndeu daeuj daj cungj mbouj ndaej, gek nanz caiq daeuj daj hix mbouj ndaej, yw mbouj mizyauq lo, aeu gek seiq aen singgeiz couh ndaej caiq daeuj daj mbat he. Boux canghyw naengh gizhaenx henzdaiz lij nem miz hangz ci he: Bouxgeq, bouxbing, bouxndangcanz ndaej dajcim gonq. Dan yawj gij saw neix, hawj vunz roxnyinh aen sim raejrubrub.

Gou byaij gvaq baihlaeng bae, caeuj gyoengqvunz caez baiz doih. Mbouj geij nanz, couh baiz daengz baihnaj boux canghyw naengh gizhaenx lo. Gou ndenq sinhfwnceing gvaqbae, boux canghyw haenx cam gou: “Geij ngoenz neix baenz ae, fatndat roxnaeuz aen ndang miz maz mbouj soeng lwi?” Gou naeuz: “Mbouj miz.” Gou gangj sat, canghyw couh



ndenq mbaw biuj he hawj gou sij, riunyumyum naeuz: “Mwngz gaem mbaw biuj neix haeuj baihindaw bae baiz doih ba.”

Byaij haeuj baihindaw bae, haujlai vunz ndwn youq gizhaenx ndaetfwd, naihsim baiz doih. Boux canghyw ndeu sing hung naeuz: “Daihgya gaej simgip, dawz mbaw biuj sou gaeng sij ndei gvaq mbiengneix daeuj baiz doih gonq, nyaenj gij siusik sou haeuj ndaw dennauj bae, caiq dawz bae baihnaj song boux canghyw de cuengq ndei, heuh daengz coh bouxlawz, bouxde couh gvaqbae daj yizmiuz. Daj ndaej le, lij caengz ndaej deuz baenz vaiq, aeu ndomqyawj bueng aen cungdaez cijndaej.” Gyoengqvunz dingq le, cungj ei gij vah de bae guh.

“Banh Gveicingh!” Boux canghyw gaem mbaw biuj he swenj naeuz. Ndaw vunz lai doenghnyaunau, mbouj raen miz vunz byaij okdaej.

“Banh Gveicingh youq gizlawz?” Boux canghyw haenx youh swenj naeuz. Gyoengqvunz mwngz yawjyawj gou, gou yawjyawj mwngz, vanzlij mbouj raen miz vunz byaij okdaej.

“De gaeng ndaej roekcib bet bi lo, roxnaeuz gvaq gizgungx lawz bae vietnaiq lo.” Lingh boux canghyw gaem mbaw biuj doq yawj doq naeuz.

Heuh daengz mingzcoh mbouj raen vunz, gyoengqvunz da muenghmyoegmyoeg deq daj yizmiuz, mbouj ndaej sai seizgan, song boux canghyw nyaengqnyetnyet cug boux daj, buek vunz neix daj ndaej le, lingh buek vunz youh haeujdaej.

“Canghyw, gou ma daengz lo, gou heuhguh Banh Gveicingh, lwnz daengz gou daj caengz? Haetneix gwn di doxgaiq gyoet, dungx mbouj ndei, haxbaenh bae diengzhaex lo. Ra mbouj raen diengzhaex simgip lai, aen soujgih daeglwng ngamq cawx ndaej haenx hix deng doek gwnznameh bae, sanq caez lo. Caeklaiq baengh dahsau husw neix daiq gou bae diengzhaex, lij bang gou dawz aen soujgih cang ndei coih ndei.”

Gou muengh gvaqbae, raen dahsau husw niennomj ndeu fuz bouxlaux gvaqdaej, aen sim gou roxnyinh raeuj

dangqmaz.

“Daxmeh ya daxmeh ya gou naemj mwngz, mbouj miz mwngz gij saedcej gou roxnyinh gig fwzmbwq……” Sawqmwh, ndaw vunz lai miz soujgih yiengj hwnjdaej.

Dingqnyei souj go neix, aen sim gou ngeixlangh bae gyaegyanyang, gou naemj hwnj mbanjranz, naemj hwnj daxmeh. Baenzlai nanz mbouj ma mbanjranz, mbanjranz dwg mbouj dwg bienq yiengh haujlai lo? Daxmeh dwg mbouj dwg youh bienq geq di lo?

“Gijmaz, daxmeh youh mbouj raen lo, gou seizneix youq yihsen baiz doih daj yizmiuz, lij caengz lwnz daengz gou ne. Couh yienghneix gonq, gou seizneix lijdwg dauqranz caeuj mwngz caez bae ra daxmeh ba!” Aen sing yienh ndaej gig gip he gangj naeuz.

Boux ciep dienhvah dwg daegcoz ndaej ngeihcib geij bi he, de simgip ndaej saeknaj bienq hau, najbyak miz raemxhanh iemq okdaej.

“Canghyw, daxmeh gou ukgyaeuj bienq ngawz, aeu seizseiz henyawj cij ndaej. Haetneix gou daeuj daj yizmiuz, mehyah gou bae haw cawx byaek, daxmeh mbouj rox seizlawz yumzymum gag hai dou okbae lo. Seizneix mehyah ra mbouj raen daxmeh, gip ndaej daej

lo, gou dauqranz gonq caeuj de caez bae ra daxmeh, ngoenzcog caiq gvaqdaej daj yizmiuz.” Bouxsai byaij gvaqbae naeuz.

“Yienghneix hix ndaej, mwngz song ngoenz neix aeu cagaenj seizgan daeuj daj, cienggeiz gaej ceiz lai bw.” Canghyw dap naeuz.

“Daegmbauq, mwngz miz saehgip, seizneix lwnz daengz gou daj lo, mboujnex mwngz bae daj gonq.” Dahcej he ndwn youq doiqnaj gou naeuz boux daegmbauq neix.

“Docih mwngz dahcej lo, seizneix couhsuenq mwngz nyiengh hawj gou bae daj gonq, lij aeu ndomqyawj bueng aen cungdaez cij ndaej deuz ne, mbouj miz baenzlai seizgan deq lo.” Bouxsai gangj sat, yamq hung byaij ok yihsen.

Daj ndaej yizmiuz le, gou caeuj gyoengqvunz youq lingh giz yietnaiq ndomqyawj bueng aen cungdaez. Gizhaenx baij miz haujlai aen daengq, gokciengz lij cuengq miz aen gihgi gwn raemx ndeu. Boux canghyw ndeu gvaqdaej riu naeuz: “Gizneix raemxndat raemxgyoet cungj miz, bouxlawz hozhawq couh gag daeuj gwn.” Fwngz gou gaem boiceij raemxraej, caen hawj vunz ndang raeuj sim engq raeuj.

“Guekgya doiq raeuz caen ndei, daj yizmiuz mbouj deng ok saek faen cienz.” Miz vunz naeuz.

“Dingqnaeuz yizmiuz neix gig bengz, danghnaeuz gag ok ngaenz bae daj, mbouj miz geij lai boux sai ndaej gij ngaenz neix bw.” Lingh boux han naeuz.

“Yizmiuz guek raeuz ancienz, doiq ndangdaej mbouj miz haih, gij guekgya wnq cungj ceng daeuj cawx.”

“Mbanjranz gou miz di doekgungx, yihsen lij haici bae coux gij bouxgeq byaij loh mbouj ndaej haenx bae yihsen daj yizmiuz ne.”

“Guekgya caeuj cwngfuj gvan-

sim raeuz, seizseiz dawz raeuz cuengq haeuj ndawsim bae, gyoengqvunz doxhuz caez youq, doxbang doxcoengh, mingh raeuz caen ndei, seng youq aen biengz neix, vaiqvued vuenyungz raixcaix.”

.....

Gyoengqvunz mwngz gangj gou naeuz, doqgyaeuj gangjsebseb, gou youh roxnyinh raq hei qndat he daj ndawsim biu hwnjdaej, cimq doh daengx ndang raeujrubrub.

